

Remitido

E origen, significacion, reconocimiento y e celebracion di "18 di maart"



Shon A. Eman (q.e.p.d.)

Pa introduccion:

1. Como simbolo, muestra di reconocimiento y gratitud pa Shon A (q.e.p.d.) a scohe "18 di maart" como "Dia Nacional".
2. Decision unanime di Consejo di Partido de MEP riba iniciativa y proposicion di Betico Croes (q.e.p.d.) y despues esaki a keda trata y aproba den sala di Parlamento! Manera ta conoci y ta keda graba den e analnan di e historia politico y estatal di Aruba y di Reino dia 18 di

maart 1948 Cornelis Albert (Shon A) Eman solemnemente y oficialmente a entrega na e Conferencia di Mesa Rondo na Den Haag, e peticion pa Aruba haya "Separacion" di Corsow. Separadamente a entrega La Reina un lista di 2147 firmante sosteniendo e peticion di Shon A.E peticion aki-despues di a wordo rechasa den prome instancia dia 16 di maart-riba insistencia di Shon A finalmente a keda acepta unanimamente na

e Conferencia di Mesa Rondo dia 18 di maart 1948.

Esaki y nada otro, ni mas y ni menos ta e origen y e significacion di e fecha 18 di maart 1948 den e historia politico y estatal di Aruba y di Reino. Y ta esaki tambe, nada otro ni mas ni menos tabata e motibo cu Betico a scohe e fecha 18 di maart pa celebra como Dia Nacional di Aruba.

Cu ta celebra "Dia di Himno y Bandera" dia 18 di maart tambe ta di elogio y no ta kita nada pero absolutamente nada di e origen y e significacion di e fecha "18 di maart", al contrario e ta duna otro reconocimiento y duna mas valor na e significacion di 18 di maart. Esaki ta conta mescos pa e celebracion cu ta tuma lugar riba e Plaza 18 di Maart como honor y gradicimento na e 2147 persona cu a firma e lista cu a keda entrega na La Reina Juliana pa sali di e constelacion politico Antiyano y keda cu laso estatal directo cu Hulanda.

Betico, -kende semper a keda agradecido cu Shon A a introducie den politica y pa cual semper orguyosamente a keda bisa cu e ta un dicipulo politico di Shon A- apesar di tur controversia cu por a surgi den seno di AVP y a conduci pa lanta su propio partido MEP, semper a keda respeta y admira Shon A como un role-model pa su humildad, su serenidad, su sabiduria, su corahe y su perseverancia cu venciendo tur obstaculo finalmente a logra cu e Conferencia di Mesa Rondo



Betico Croes (q.e.p.d.)

dia 18 di maart 1948 a acepta e mocion cu ta reconoce e derecho di Aruba pa haya separacion di Corsow. Betico nunca a sconde su sintimentonan di respet, di admiracion y di reconocimiento pa Shon A. Prueba di esaki ta e echo e tabata mantene un potret grandi di Shon A colga den su oficina na su cas na Cumana 84. Esaki despues cu e a bandona fila de AVP y despues cu e a funda y tabata lider maximo di MEP. Esaki ta otro parti di muestra di e grandesa y e espiritu di noblesa cu Betico semper a demostra como hende y politico. Pueblo di Aruba, ban uni y duna respet, reconocimiento, honor y

gratitud na Shon A pa e hecho historico cu e mocion cu e a presenta dia 18 di maart 1948 y cu e Conferencia di Mesa Rondo a acepta, a pone e fundeshi pa Aruba logra e derecho di separacion (despues yama Status Aparte) for di Corsow; ban duna respet, reconocimiento, honor y gratitud pa e 2147 personanan cu tabatin e corahe pa firma e lista cu a wordo entrega na La Reina Juliana pa Aruba haya e tan desea separacion (lesa: Status Aparte); ban duna respet, reconocimiento, valor y honor na nos "Himno y Bandera" cu tambe ta wordo celebra dia 18 di maart. E fecha "18 di maart" ta mara den un forma asina inseparable na Shon A y e 2147 firmante, cu esaki mester keda refleha tambe den cualquier celebracion y ceremonia oficial na su honor y di e firmantenan. Esaki mester keda refleha tambe riba "Plaza 18 di maart" caminda nos gobiernantenan, pueblo di Aruba en general sin distincion di raza, religion of color politico e dia ei den un forma uni tambe por rindi e debido respet, reconocimiento, honor y gratitud na Shon A y e 2147 firmante. Ban haci esaki cu e mesun grandesa y den e mesun espiritu di noblesa cu semper a caracteriza Betico como persona y como politico. Gobiernantenan, nos pueblo, ban uni y haci di dia 18 di maart un berdadero "Dia Nacional". Biba "18 di maart", biba nos "dia nacional", biba nos "Status Aparte" y biba Aruba!

Co-fundador y ex-secretario di MEP,
Milton D. Gomez

Nota di Redaccion: E remitido aki ta wordo publica riba peticion di un lesado di Bon Dia Aruba. Bon Dia Aruba no ta responsabel pa e contenido.